

GEORGICON I

grandiaque effossis mirabitur ossa sepulcris.
 di patrii Indigetes et Romule Vestaque mater,
 quae Tuscum Tiberim et Romana Palatia seruas,
 hunc saltem euerso iuuenem succurrere saeclo 500
 ne prohibete. satis iam pridem sanguine nostro
 Laomedontae luimus periuria Troiae;
 iam pridem nobis caeli te regia, Caesar,
 inuidet atque hominum queritur curare triumphos, 504
 quippe ubi fas uersum atque nefas: tot bella per orbem,
 tam multae scelerum facies, non ullus aratro
 dignus honos, squalent abductis arua colonis,
 et curuae rigidum falces conflantur in ensem.
 hinc mouet Euphrates, illinc Germania bellum;
 uicinae ruptis inter se legibus urbes 510
 arma ferunt; saeuit toto Mars impius orbe,
 ut cum carceribus sese effudere quadrigae,
 addunt in spatia, et frustra retinacula tendens
 fertur equis auriga neque audit currus habenas.